

Parlamento a aproba retiro di minister Yrausquin

ORANJESTAD – Parlamento a aproba e retiro di minister di Financia, Juan David Yrausquin ayer.

Riba 4 di juli sr Yrausquin a entrega su retiro na gobernador Fredis Refunjol. Motibo pa esaki ta loke e mandatario ta yama 'abuso increibel di poder' di parti di gobierno Hulandes, cual segun e a wordo sosteni pa e propio gobernador. E dia ey el a bisa Bon Dia Aruba cu Aruba a wordo haci "un gran inhumicia" y cu prome minister Mike Eman no tabatin otro opcion cu bay di acuerdo cu un investigacion riba presupuesto.

E carta di retiro di sr. Yrausquin a wordo trata den un reunion di Comision Central. Partido di oposicion MEP pa

medio di miembro di fraccion Ady Thijsen a keha cu e reunion aki tabata hopi riba man atrobe. Lider di PDR, Andin Bikker, no tabata presente. AVP si a atende e reunion y a laga sa cu nan no tabatin obhecion contra e retiro di sr Yrausquin.

Arogancia

Parlamentario Thijsen a hisa palabra den e reunion den nomber di fraccion di MEP y a splica dicon su partido ta aproba e retiro. "Na prome luga pasobra e ta e causante di e impasse cu Aruba a haya su mes den e ultimo 2 siman, y pasobra e tabata tin e arogancia di a presenta un presupuesto irealistico y cu yen di buraco.

E arogancia di Yrausquin a causa e crisis den relacion cu

gobernador y cu Hulanda, pasobra e por a evit'e."

Un otro motibo pa e partido aki ta cu nan ta haya cu sr. Yrausquin a "bende patria pasobra e hunto cu Mike Eman a entrega nos autonomia financiero na Hulanda na februari di e aña aki".

Sr. Yrausquin mes tin un otro opinion manera el a pone den su carta di retiro.

"E abuso di poder a causa y ainda ta causando daño serio na e credibilidad y financia publico di nos pais pa cual mi no por sigui carga responsabilidad." Yrausquin a muestra den su carta cu e ta esun cu ta carga e responsabilidad ministerial pa e actonan di gobernador pa loke ta financia publico. P'esey el a saca su propio conclusion y ta asumi responsabilidad politico pa

loke e ta cualifica como abuso di poder cometi pa gobernador. Segun e mandatario, den e ultimo simannan gobierno Hulandes, bou capa di gobernador a eherce autoridad riba Aruba "sin tin e responsabilidad legal, constitucional, ni financiero na momento cu tin consecuencianan pa nos pais."

Futuro

Despues di entrega su retiro, prome minister Mike Eman a laga sigui combersacionnan cu sr. Yrausquin pa wak con hunto por sigui sirbi pais Aruba.

Te awor no ta cla kico e resultado di e combersacionnan aki ta. Sr. Yrausquin si a bisa cu e ta para 100% tras di e partido y sr. Eman, y den un of otro forma lo keda yuda e partido/gobierno. □